

‘A TRUSCIA

...E trùscia la matìna,
e trùscia a menzijornu,
oh, focu, chi rrovina !
Signori, chi ttalòrnu !

Mi scippu li capìdhi,
pistu li pedhi ‘nterra:
la bùggia non arrìdhi,
li spicciuli su’ ‘nguerra...

Signori chi condanna !
Chi fazzu? Chi rripàru ?
Sta trùscia chi mi danna
Pe mmia è nnu ‘mpicciu amàru !

E mancu ‘ntra lu lettu
Jeu pozzu avìri paci,
pari ca pe’ ddispettu
‘sta tinta mi la faci!

Sentu ‘nu tubi tubi:
s’affaccia me’ mughghèri:
- senza mu ti disturbi
Sicùru è carchi sceri...

Dàssalu pemmu abbàtti
Pe mmo cu’ ndeppi ndeppi...
Se ppoi voi mu lu tratti:
jèttanci lu zì peppi! –

Cercu mu m’addormentu,
lu sonnu no mmi veni,
Signùri chi tormentu,
Madonna, quantu peni!

No m’assa ‘nu mumentu
Sta trùscia maliditta,
pe mmia no nc’eni abbèntu
pe mmia pari disditta...

E ssempi stu talòrnu
e ssempi sta rovina,
e trùscia a menzijornu,
e trùscia la matìna!

Francesco Laruffa